

TN50 beri peluang wanita salur aspirasi



FOTO HIASAN

Hari wanita dianjurkan bagi memberi penghargaan ke atas sumbangan yang diberikan golongan hawa.



Antara aspirasi wanita ialah supaya lebih ramai menceburi bidang didominasi lelaki, tiada keganasan dalam rumah tangga dan persekitaran kondusif bagi golongan ibu berkerjaya”

Rohani Abdul Karim,
Menteri Pembangunan Wanita, Keluarga dan Masyarakat

Kuala Lumpur: Sambutan Hari Wanita Kebangsaan 2017 buat julung kali menghimpunkan acara besar dalam satu majlis, termasuk menganjurkan Global Women's Trade Summit dan sesi Dialog Perdana bersama Perdana Menteri, Datuk Seri Najib Razak (TN50) yang akan diadakan di Berjaya Times Square, pada 4 September ini.

Menteri Pembangunan Wanita, Keluarga dan Masyarakat, Datuk Seri Rohani Abdul Karim, berkata acara berkenaan diadakan serentak supaya momentum penghayatan dan penghargaan sumbangan wanita dapat dilakukan dalam perhimpunan berkenaan secara lebih positif.

Katanya, wanita seharusnya bersama-sama menyertai setiap acara disediakan, termasuk Global Women's Trade Summit yang menjadi platform tepat menggalakkan wanita Malaysia melangkah jauh pada peringkat global, kerana ia akan membentangkan panduan dalam dunia ekonomi dan perdagangan yang serba mencabar.

Perkasa golongan wanita

“Hari Wanita Kebangsaan 2017 akan dirasmikan Perdana Menteri dan acara yang diadakan bertepatan dengan tema Wanita: Pengubah Ekonomi Global, sejajar dengan peranan golongan itu dalam bidang ekonomi.

“Antara insan ternama terbahit dalam sesi berkenaan ialah Pengasas Goget, Franchesa Chia yang akan berkongsi pengalaman dalam bidang perdagangan,” katanya kepada BH.

Rohani berkata, pada Sesi Dialog TN50, wanita seharusnya menyalurkan aspirasi mereka untuk di-

dengar Perdana Menteri, berikutan aspirasi berkenaan akan menjadi panduan kerajaan dalam melaksanakan sesuatu, termasuk membentuk dasar, undang-undang dan sebagainya.

“Dalam TN50 bersama Menteri Belia dan Sukan, Khairy Jamaluddin Abu Bakar, baru-baru ini, antara aspirasi wanita ialah supaya lebih ramai menceburi bidang didominasi lelaki, tiada keganasan dalam rumah tangga dan persekitaran kondusif bagi golongan ibu berkerjaya.

“Justeru, saya berharap sesi bersama perdana menteri akan lebih rancak dengan pelbagai aspirasi lagi,” katanya.

Menyemarakkan sambutan itu nanti, Rohani berkata pelbagai aktiviti, termasuk rawatan spa kesihatan percuma dengan kerjasama Yoyoy Kamphora Spa dan D Aura Spa turut diadakan.

“Bukan setakat itu, pejabat Pembangunan Wanita Wilayah Persekutuan Kuala Lumpur dan Putrajaya mendapatkan kerjasama daripada pakar terapi spa bergerak menawarkan perkhidmatan urutan badan secara percuma kepada wanita,” katanya.

Sambutan Hari Wanita Kebangsaan turut disemarakkan dengan pembukaan laluan khas buat wanita di kementerian dan agensi kerajaan berkaitan sehingga 8 September.

“Selain pada peringkat kementerian antara agensi bersetuju mengadakan kaunter laluan khas untuk wanita adalah Jabatan Pendaftaran Negara, Jabatan Imigresen Malaysia, Kementerian Kesihatan, Suruhanjaya Perkhidmatan Awam, Kastam dan Jabatan Pengangkutan Jalan,” katanya.